

詩苑

宋舊
二家
宮

人衆
宮詩

芳詞





詩苑衆芳

劉瑄編

編主五雲王

編初成集書叢

種二他其及芳衆苑詩

中華民國二十五年六月初版

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

鎮

詩苑衆芳

吳郡梅谿劉瑄伯玉敬編

長樂潘氏

名枋·字庭堅·號紫巖·乙未榜鼎魁·甲辰歲嘗仕于吳·

涵空閣

危欄貪倚眺·薄暮不能休·直下疑無地·滿前都是秋·晚山平入畫·新月側當樓·莫說興亡事·吟人本白頭·

虎丘分韻得落字

急雨成快晴·晚日射口薄·院靜轆轤聲·崕古枇杷落·澄泓有潛鱗·寥廓無歸鶴·明年當掛冠·吾志在丘壑·

次陳仲文八月十二夜韻

癡雲吹盡月行天·新琢冰輪欠半邊·須信缺中元不缺·便教圓處可長圓·寒生沙渚雁初下·冷浸紗窗人未眠·萬事虛盈皆此類·幾看如鏡復如絃·

雪中聽縣州鄧道士琴

黃冠家萬里·忽此動搖琴·歲暮多風雪·天涯少信音·淒涼當日事·寂寞此時心·我醉君休去·蒲團共夜深·

曹娥廟

一川紅漲夕陽波。幼婦碑殘鎖綠蘿。不止但爭三十里。曹瞞元不識曹娥。

書趙知院墨梅後

疎葉暗藏春意足。橫枝老閱歲華深。廣平能賦君能畫。總是平生鐵石人。

浦城章氏

名康。字季思。號雪澗。隱居吳門。終身不仕。

秋興

有客凋雙鬢。吟秋費幾詩。天高鳥去疾。雲薄雨來遲。日落山川迥。風回草木悲。追尋十年事。佇立獨多時。

遷居親戚攜酒見過

老吾元住雪邊涯。萬事無堪兩鬢華。頃歲西河方借宅。今年東野又般家。巷深政恐難邀客。地空何妨學種花。多謝所親相暖熱。新生涯卽舊生涯。

建安黃氏

名簡。字元易。號東浦。隱居吳郡光福山。與雪崖爲友。

過沈尙書墓

履聲推早達。日燕自林泉。浮世若無死。貴人真是仙。從容將八袞。掩忽便千年。墓上青松合。豐碑竟不鐫。

懷古

翠纓紅遮豔粉圍。春風夜夜可曾歸。十年再撫章臺馬。巷陌人家大半非。

題謝一顰春雨圖

此是南塘所作
誤刊于前

久客長安思野人。今年糴貴更愁新。江蕪漠漠春多少。展卷聊尋夢裏身。

古汴趙氏

名汝談。字履常。號南塘。

洞霄觀水

峽口蒼蒼放水時。乾風吹落面前詩。可憐無地遮秋色。流出千山也自奇。

寄趙昌父

楊柳風吹社雨晴。櫻桃花發野塘春。歸來依舊青山好。白髮看山有幾人。

新定方氏

名萬里。字鵬飛。號蕙巖。

登雲巖塔二絕

湖迥山明玉宇澄。浮圖絕頂快高登。天風吹我今宵夢。多在瑤臺十二層。
窳塔崔嵬置曲欄。不知身在碧雲端。墨題便是慈恩約。只尺聯鑣上廣寒。

吳郡鄭氏

名起潛。字子升。號立菴。

和蕙巖登塔韻

秋向空高分外澄。排雲攜手共梯登。舉頭便是蟾宮路。休問青霄有幾層。

巍倚浮圖幾曲闌。遠山屏翠擁林端。鵬程便好乘風上。不管瓊樓高處寒。

題淵明採菊圖

閑卻經綸手。東籬把菊枝。先生花外意。難畫亦難詩。

題蜀道難圖

蜀道難從古。于今分外難。江山風景在。忍把畫圖看。

廬陵文氏

名天祥。字宋瑞。號文山。

寄題琴高臺

涇水紺以深。古有神人潛。靈鮪煦春藻。微波漾幽瀾。朝岑翳長嵐。暮汎暖蒼烟。回首宋康王。子今定何年。飛僊已高邁。遺蹤落清淵。至今空山夜。泠泠琴上絃。西瞻旛霧中。霞光輝遠天。何當駕長風。一睨涇水漣。高安郡治有堂名碧落。誠齋楊文節公在郡時賦詩八章。庚申兵火。堂亦不免。後四年。余自著庭出守。爲之起廢。甲子秋。堂成。復刻誠齋詩于其上。重九日。攜客落之。遂賦是詩。

大厦新成燕雀懽。與君聊此一儉閑。地居一郡樓臺上。人在半空烟雨間。整葺復還新宇宙。感傷重憶舊江山。晚秋又報西風緊。頗覺憂時鬢欲斑。

都梁李氏

名迪。字惠叔。號愛梅。

挽文朝奉 狀元之父

散盡黃金爲買書。時人笑我太癡愚。一朝有子如堯叟。何處無人說老蘇。可謂死而無憾者。孰云文不在茲乎。淵明地下聞君葬。也散黃花作淚珠。

自題愛梅

我被梅花惱幾年。梅花纔發便詩顛。月明遶卻梅花樹。直入梅花影裏眠。

東吳鄭氏

名傳之。字希聖。號稻田翁。

戊寅臘望會友雙峨得薪字韻

雙峨文會友。生意藹如春。風轉聞啼鳥。冰銷樵躍鱗。焚香溫宿火。煮茗爇枯薪。一座惟吾老。欣然得句新。

古栝何氏

名宗斗。字南一。號小村。

題釣臺

貧賦漁蓑卻耐交。故人牽率政徒勞。十分拂袖歸來是。何似當時莫去高。

吳郡蔣氏

名恢。字弘道。號菊圃散人。

丹回練塘

柁轉秋塘迥。寒光徹萬尋。葉聲風外急。吟思雨中深。白髮存公道。青山適素心。疎鐘何處起。暝色正沉沉。

野色

幽事每堪娛。秋深晚霽初。帆分江影破。風勒鳥行疎。山色美無度。稻花香可書。逍遙今夕意。未厭短轡車。

三月晦日偶成

一年芳信雨消磨。負此吟懷奈若何。倚檻忽驚新綠暗。掃軒更惜落紅多。春歸惟有時禽覺。睡足從渠日影蹉。閑裏工夫閑受用。惜無閑客肯相過。

行山

六尺枯筇度遠岑。野花啼鳥助清吟。雲低似覺天根近。礪遠因知地脈深。閱世豈容無正眼。窮源須要識初心。春寒局促良堪厭。一笑陽和破積陰。

甲辰臘日遣興

臘裏春前日日陰。西疇彌覺水雲深。梅邊句好無人覓。竹外烟輕有鳥吟。發興合窮千里目。著書聊寄百年心。飜雲覆雨誰能問。納納乾坤古復今。

秋夜讀書

白紵烏紗不耐涼。晚風吹月上莓牆。舊書重讀添新味。二尺檠邊夜正長。

秋吟

落葉紛紛捲地來。手持六角障黃埃。何人眞解知秋意。與上凌虛百尺臺。

重午

逝水光陰不肯停。又從菰黍重尋盟。平生不學採蓮曲。只讀離騷配酒兵。

睡起

幽鳥無言啄落花。風吹榆莢打牕紗。先生酒醒綠陰裏。笑聽蜂兒報晚衙。

浚儀朱氏

名說字宜之
號小山

畫不如亭

連州

環遶皆山遠勝淞。地無炎瘴氣清虛。十亭留詠誇前輩。八景搜奇出故墟。拍岸驚濤通海道。插天峭壁壯侯居。烟雲變態無窮極。百幅生綃畫不如。

丁巳春勸農

勸農小隊出東禪。春事平分花柳天。亂石藏雲蒼玉洞。小溪流水紫雲田。農忙處處扶犁雨。社近家家煮酒烟。堃與未厭歸興促。公餘猶擬一橫鞭。

臨邛魏氏

名近思字求己號已齋
鶴山先生之子

小園梅未盡放。叔用府教以詩索和。勉用韻以謝。

造化機緘莫恨遲。須知開謝各因時。物華未分隨春意。梅蕊先饒露玉肌。雪裏精神千萬態。水邊瀟灑兩三枝。何當攜酒澆花去。且遣詩筒爲報知。

華陽張氏

名渠。字方叔。號芸窗。有詩集并樂府行于世。

送戴式之自越遊江西

石屏峰下孤吟客。吟到頭童更苦吟。四海江山多識面。百年人物半知心。詩于唐米偶先後。較以杜韋無古今。容易相逢容易別。不堪回首白雲深。

樓中卽事

園亭已覺晴簷暖。樓上東風尙峭寒。燕壘泥乾芹菜老。蜜房香滿杏花殘。詩懷正似曉山好。酒量不如春水寬。陌上兒童應笑我。黃昏猶自倚闌干。

有懷尤贊府季端

端

西風約暮雨。虛亭得新爽。忽焉見峻嶒。髣髴呈萬象。誰其伴孤吟。寒蛩軋幽響。碧雲渺佳人。抱膝注遐想。春盡出郊

薔薇花落筍斑斑。醞釀清和數日間。杜宇不知春去了。又啼斜日過前山。

華陽張氏

家茅峯之東。名紹文。字庶成。父號樵翁。芸窗之子。

山菴夜宿呈深居先生

松逕轉幽密。一程深一程。濤聲在平地。月色正三更。僧定欲喚起。鶴眠頻夢驚。曉來真富貴。露葉綴珠璚。

送梁中砥入道從三茅許松谿

無意覓封侯。來從長史遊。辭章唐韻度。人物晉風流。花影天壇午。松聲月澗秋。登臨盡詩境。分我半山不。

卽事

電挾雷聲迅。風將雨腳多。須臾寂無有。造化果如何。飢鼠撼幃竹。哀蛩語徑莎。披衣起中夜。有感寄長歌。

再疊

地迴秋聲遠。山空野興多。官遊聊爾耳。疎嬾奈吾何。搖落驚黃葉。推敲步綠莎。新涼大自在。對酒且高歌。

春閨怨效唐才調集體

楊柳和烟翠不分。東風吹雨上離樽。鵲絃調急難藏恨。燕子樓高易斷魂。錦字書成春夢遠。玉壺淚滿夜燈昏。馬蹄想過長亭路。細與蕭郎認去痕。

江亭晚眺

登臨便可豁雙明。吟外還能見物情。南北盛衰關大數。英雄得失總虛名。莫雲千里鄉心遠。寒雁一聲秋意清。江上白鷗應笑我。等閑虛負水邊盟。

定林 荆公讀書所

三間書屋年年在。一點禪燈夜夜明。門外青苗渾不見。半山松竹自秋聲。

金陵道中晚宿

卸卻征衣臥客牕。移牀切莫近寒蟄。空塔一雨淒涼甚。不怨梧桐怨夜長。

夜坐

金鴨香殘酒半醒。夜深寒月過虛櫺。可憐心事無人識。詩眼與燈相對青。

華陽張氏 名元道。字道元。號烟霞子。一號益齋。樵翁之子。

春愁

烟翠飽青實。雨紅黏綠苔。楊花隨夢去。鶯語喚愁來。吟事春三月。風光酒一杯。芳心久消歇。已作蕙爐灰。

搖落

搖落梧桐恨。哀吟絡緯愁。星河橫靜夜。天地入新秋。冉冉歲云邁。滔滔江自流。驚風和雁影。吹夢過南樓。

不如歸去

岷峨路遠萬重雲。錦水繁華一聚塵。帝子但知歸去好。故家城闕已他人。

春深見雁

杜若生洲荻已芽。隨陽片影向天涯。如今不用思歸去。江北江南是一家。

秋意

古鐸搖風語夜涼。露溥莎徑咽寒蟬。更長展轉難成寐。擬問希夷竟睡方。

京口呂氏

名江。字叔濟。號四平。有山中吟及蘇臺百咏刊行。

宿橫金延慶寺

水路通城近。人家與寺連。西風漁市鼓。落日野橋船。塵土非吾事。

時攝簿。被檄。俸散義倉米。

湖山似去年。今宵禪榻夢。

定是到鷗邊。

姑蘇懷古

臺成知費幾金槌。回首荒蕪走鹿麋。自是誤君由宰嚭。孰云亡國爲西施。春風蝶夢迷香徑。秋水龍文冷。銀池。四顧湖山烟雨裏。倚闌新恨入支頤。

春晚二絕

春來腳不踏青青。夢裏還家夢又醒。一樹垂楊樓外綠。鷓鴣聲不似故園聽。年華冉冉暗中移。倦客傷春只自知。雨後桃花紅未減。人情早自向荼蘼。

中秋前一日諸生攜酒見過對月同賦

半生道路鬢雙皤。又是中秋客裏過。別業可憐荒杜曲。羈懷最怕聽商歌。不知明月幾時有。如此清風良夜何。勝槩無詩可收拾。九原喚起老東坡。

秋思

一葉江頭楓葉丹。秋容慘淡客悲酸。蛩聲雨後長門怨。雁影風前行路難。無處著愁嫌地窄。有時舒眺見天寬。最憐人道蘇州月。三度中秋一度看。

石湖懷老仙

覓得宸奎扁。歸尋農圃師。堂名農圃湖山吳子國。花草范村詩。步履行春遍。綸巾帶雨欹。百年無此老。合配

雪灘祠。

贈實際英上人 菴在洞庭西山

釋氏說實際。猶吾儒說誠。夜來枕上欲作偈。忽雷雨大作。夢中得末二句。因足成之。

實際卽爲誠。中庸說著形。曉來雷雨過。七十二峰青。

山亭蔣氏 寓潤之金沙。名華子。字公實。號四清。有煮字羹刊行。

獨客

獨客秋江上。蕭蕭髮欲華。終風撼紅樹。甚雨老黃花。丘壠應無恙。音書不到家。眠孤怨遙夜。歸夢遶鷗沙。

題孫得休居室

有藥隔石盆池

住世百來年。童顏只儼然。道心丹竈外。詩趣筆牀邊。甕牖清虛府。盆池小有天。雲關誰剝啄。端是問神仙。

筭

頭角嶄嶄露。江南四月時。定應孤竹子。未脫老萊衣。怒長椿苔石。旁行過棘籬。不來能幾日。漸學翠鸞飛。

春晚謠

汀洲三月楊花飛。河鮪出水江鱗肥。雨聲翻作斷腸曲。薄寒戀戀輕羅衣。新愁壓眉雙碧聚。作意挽春春不住。無情恨殺蜀帝魂。不勸歸來勸歸去。

小杭州陳氏

名鈞。字公秉。父號靜佳。

蘆花

一舸滄江倚暮金。鷗鄉舊夢漠難尋。秋無界限風高下。月滿汀洲雪淺深。撲袖似憐衣袂薄。愁人長恐鬢毛侵。風流得及三春柳。飛盡輕絲又綠陰。

和人湖天秋晚

不入生綃作畫看。波光無極暮天寬。船離漁屋無多地。雁落蘆花第幾灘。一曲滄浪人獨釣。滿襟霜露月生寒。此中已去人間遠。濯髮空閒到涓盤。

秋思

宦情羈思兩悠悠。出岫無心盍去休。
鄰巷孤砧人靜夜。江樓一笛月明秋。
水流西塞因思鱸。豆落南山歸飯牛。
琴不相隨仍縱鶴。可曾風浪覆虛舟。

喜雨

落盡滿林花。驟長沿塔草。
花草不關心。秧嫩桑條老。

和伯丈薛制參二絕

秋塘風露蟄羣蛙。烟樹參差寫暮鴉。
凝立不知襟袖冷。寒蘆點點墮輕花。
別岼烟深曉樹昏。飢禽點點歷平村。
朝暉紅透風初動。微見前峰綠一痕。

梅花

離騷草木盡沉馨。獨抱閑愁倚素屏。
石逕荒寒春未覺。霜風淒緊鶴初醒。
故山入夢雲千里。瘦影相看月一庭。
深夜忽鳴何處笛。征鴻歷歷楚天青。

三山蕭氏

名炎。字寬夫。號葛坡。

春歸二絕和高希遠韻

晴窗如暝樹雲遮。紅紫成埃減陌車。
不信春歸無綰繫。尙存一架木香花。